

# In vore ancje su Internet

Il Friûl si prepare a celebrâ domenie ai 3 di Avrîl la sô fieste nazionâl che e viodarà Gardiscje tant che “capitâl” par chest 2016.

Felant de Fieste de Patrie dal Friûl no podevin no contactâ il gnûf diretôr de storiche riviste mensîl in lenghe furlane “La Patrie dal Friûl”, che dal 1946 e conte un “Friûl plui furlan”, cemût che si lei ancje sul sît [www.lapatriedalfriul.org](http://www.lapatriedalfriul.org). Di fat **Dree Venier**, dopo une prime esperience tant che diretôr dal 2007 al 2010, al torne ae direzion cjapant cheste volte il puest di **Dree Valcic** che al devente president de associazion editore dal mensîl.

Il prin numar di cheste gnove vieste al è stât presentât a Fevrâr a Tombe di Merêt e il numar di Avrîl al è za daûr a rivâ tes cjasis dai abonâts. Tra i aspjets di novitât a son gnovis rubrichis tant che “netiti la lenghe”, par tornâ a doprâ un furlan mancûl talianât, e “Cemût che si lei la grafie furlane” par judâ i furlans a cjapâ plui confidence cu la lenghe scrite.

“O ai agrât al grup di cola-



Ideis e gnovis propuestis di **Dree Venier**, tornât ae direzion de “La Patrie” chest an, cjapant il puest di **Dree Valcic**.

boradôrs: zovins e di cualitât” i ten a marcâ Venier, che al fâs presint ancje un altri aspjet “O stin lavorant fuurt su Internet cuntun sît che nus fâs di archivi e une pagjine facebook une vore ative che e pues contâ passe undis mil ‘Mi plâs’: dut chest nus jude a promovi la riviste, ma ancje a

tignî dongje la comunitât furlane che e je in dut il mont”.

## BRUTE SORPRESE

Venier al firme su chest numar un servizi su la storie de fieste nazionâl, ma ae nestre domande sul valôr di chest inovâl vuê, nus rispuint “Beh,

rispriet a cualchi an indaûr che i Furlans nancje no savevin che o vevin une bandiere, cumò cualchi pas indevant al è stât fat, ma il Parlament chest an nus à ruvinade la fieste cu la cuistion di Sapade tradide”. Venier al cjape la ocasion ancje par une riflission preocupade su cheste date che dal 2015 e je stade uficializade de Regjon “Pre Checo al diseve che quant che une idee e je biele, il podê a prin colp al cîr di copâte; se nol rive, al cîr di comprâte; se nol rive ancjemò no, le fâs sô e le smamîs”: une sorte di alerte, in spiete di fâ un belanç, ancje savint che une part dai finanziaments a saran spindûts a Triest.

L’ultin numar de riviste al sarà presentade sabide ai 9 di Avrîl aes 11 denant misdî, li de aziende agricole Tami, a Buri, dulà che a intervignaran Valcic e **Christian Romanini**, segretari di Glesie Furlane.



[ilfriuli@ilfriuli.it](mailto:ilfriuli@ilfriuli.it)

## DI GARDISCJE A UDIN

# Il balon in Fieste pai 3 di Avrîl

Ai 3 di Avrîl si fasarà fieste in dut il Friûl par ricuardâ i 939 agns de costituzion dal Stât patriarcjâl furlan. La manifestazion principâl si tignarà a Gardiscje (Gradisca d’Isonzo) cun events rievocatîfs e culturâi par dute la zornade, comprindude la proiezion dal video cul rapper **DJTubet** intal stadi Friûl, prime de partide. Indi fevelìn cun **William Cisilino**, diretôr de Agjenzie regionâl pe lenghe furlane, che chest an e à coordinât l’event.

## Aial sens, in di di vuê, dedicâ une fieste a fats avignûts scuasit mîl agns indaûr?

“O disarès che al à plui sens, par cui che al vîf in Friûl, vignî a Gardiscje ai 3 di Avrîl, che no sierâsi dentri di un centri comerciâl. Fra une robe e chê altre e je la stesse diference che e passe fra un codîc miniât de Ete di Mieç e un di chei volantins publicitaris che ti lassin te buche des letaris. Cun dut a chel o sai che cetancj furlans a varan miôr fâ alc altri chê di”.

William Cisilino



## Parcè?

“Parcè che scuele e media, di agnorums, a lavorin par scancelâ il Friûl. Dit chest, o vuei ancje fâ autocritiche: o crôt che o varessin di lavorâ di plui par rivâ a comunicâ ai furlans l’impuartance des lidris. Il probleme, chi, nol è dome chel de lenghe: cun jê al va discomparint un mont di valôrs e di ideis che a son un patrimoni. Chest patrimoni al va puartât indevant di par di tes nestrîs piçulis comunitâts, ma si à di capî ancje che al

covente un moment corâl, dulà che il Friûl al vegni fûr in dute la sô fuarce”.

## Ce sêso daûr a fâ a chest pro?

“L’Arlef chest an, insieme cul rapper DJTubet e il regjist **Massimo Racozi**, e à realizât un videoclip che al fâs la storie dal Friûl in 3 minûts: si clame “No sta a contâmi dome chê storie”. Lu vin fat pensant ai zovins e a chei che par solit no si interessin di chestis robis. Par chel, si sin acuardâts cu la Udinês par fâlu viodi intal stadi Friûl ai 3 di Avrîl prime de partide”.

## Se al ves di strucâ intun sproc il significât de Fieste, ce disaressial?

“Parafasant Pasolini, o disarès che, se si rindessin cont pardabon di cui che o sin, un grant orizzont si vierzarès denant dai nestrîs voi. O vin di decidi lucidamenti ce che o volìn fâ e ce che o volìn jessi. Cognossi la nestre storie nus jude par chel”.